

摘藻堂四庫全書薈要

史部

欽定四庫全書薈要

史部
元史卷一百一十三

詳校官內閣侍讀臣孫球



欽定四庫全書舊要卷六千四百八十 史部

元史卷一百一

明翰林學士亞中大夫知制誥兼修國史宋濂等修

志第四十九

兵四

展齊

元制展齊者驛傳之譯名也蓋以通達邊情布宣號令
古人所謂置郵而傳命未有重於此者焉凡站陸則以

馬以牛或以驢或以車而水則以舟其給驛傳璽書謂之鋪馬聖旨遇軍務之急則又以金字圓符為信銀字者次之內則掌之天府外則國人之為長官者主之其官有驛令有提領又置托克托和斯於關會之地以司辨詰皆總於通政院及中書兵部而站戶闕乏逃亡則又以時僉補且加賑恤焉於是四方來往之使止則有館舍頓則有供帳饑渴則有飲食而梯航畢達海宇會同元之天下視前代所以為極盛也今故著其驛政之

大者然後紀各省水陸凡若干站而遼東狗站亦因以附見云

太宗元年十一月敕諸牛鋪馬站每一百戶置漢車一十具各站俱置米倉站戶每年一牌內納米一石令百戶一人掌之北使臣每日支肉一斤麪一斤米一升酒一瓶四年五月諭隨路官員并展齊人等使臣無牌面文字始給馬之驛官及元差官皆罪之有文字牌面而不給驛馬者亦論罪若係軍情急速及送納顏色絲

線酒食米粟段匹鷹隼但係御用諸物雖無牌面文字亦驗數應付車牛

世祖中統四年三月中書省定議乘坐驛馬長行馬使臣從人及下文字蘇拉解子人等分例乘坐驛使臣換馬處正使臣支粥食解渴酒從人支粥宿頓處正使臣白米一升麪一斤酒一升鹽油雜支鈔一十文冬月一日支炭五斤十月一日為始正月三十日終住支從人白米一升麪一斤長行馬使齎聖旨令旨及各省部丈

字幹當官事者其一二居長人員置宿頓分例次人與粥飯仍支給馬一匹草一十二斤料五升十月為始至三月三十日終止白米一升麪一斤油鹽雜用鈔一十文投呈公文蘇拉解子依部擬宿頓處批支五月雲州設站戶取迤南州城站戶籍內選堪中上戶應當馬站戶馬一匹牛站戶牛二隻於各戶選堪當站役之人不問親軀每戶取二丁及家屬於立站去處安置 五年八月詔站戶貧富不等每戶限四頃除免稅石以供鋪

馬祇應已上田畝全納地稅 至正六年二月詔各道
憲司如總管府例每道給鋪馬劄子三道 七年正月
省部官定議各路總府在城驛設官二員於見役人員
內選用州縣驛設頭目二名如見役人即是相應站戶
就令依上任事不係站戶則就本站馬戶內別行選用
除托克托和斯依舊存設隨路見設總站官罷之十一
月立諸站都統領使司往來使臣令托克托和斯盤問
八年正月中書省議鋪馬劄子初用蒙古字各處展齊

未能盡識宜繪畫馬匹數目復以省印覆之庶無疑惑

因命今後各處取給鋪馬標附文籍其馬匹數付驛史房書寫畢就左右司用墨印印給馬數目省印印訖別行附籍發行墨印左右司封掌 九年八月諸站都統

領使司言朝省諸司局院及外路諸官府應差馳驛使臣所齎劄子從托克托和斯辨詰無托克托和斯處令總管府驗之 十一年十月命隨處展齊直隸各路總管府其站戶家屬令元籍州縣管領 十三年正月改諸

站都統領使司為通政院命降鑄印信 十七年二月

詔江淮諸路增置水站除海青使臣及事干軍務者方

許馳驛餘者自濟州水站為始並令乘船往來 十八

年閏八月詔除上都榆林迤北展齊外隨路官錢不須

支給驗其閒劇量增站戶協力自備舒蘇當站 十九

年四月詔給各處行省鋪馬聖旨揚州行省鄂州行省

泉州行省隆興行省占城行省安西行省四川行省西

夏行省甘州行省每省五道南方驗田糧及七十石者

准當站馬一匹九月通政院臣言隨路展齊三五戶共
當正馬一匹十三戶供車一輛自備一切什物公用近
年以來多為諸王公主及正宮太子位下頭目識認招
收或冒入投下戶計者遂致展齊損弊乞換補站戶從
之十月增給各省鋪馬聖旨西川京兆泉州十道甘州
中興各五道二十年二月和琳宣慰司給鋪馬聖旨
二道江淮行省增給十道都省遣使繁多亦增二十道
給之七月免站戶和顧和買一切雜泛差役仍令自備

舒蘇十一月增給甘州行省鋪馬聖旨十道總之為二十道十二月增各省及轉運司宣慰司鋪馬聖旨三十道江淮行省十道四川行省十道安西轉運司分司二道荆湖行省所轄湖南宣慰司三道福建行省十道二十一年二月增給各處鋪馬劄子荆湖占城等處本省一十道荆湖北道宣慰司二道所轄路分一十六處每處二道山東運司二道河南運司七道宣德府三道江西行省五道福建行省所轄路分七處每處二道司

農司五道四川行省所轄順元路宣慰司三道思州播
州兩處宣撫司各三道都省二十道四月定增使臣分
例正使宿頓支米二升麪一斤羊肉一斤酒一升柴一
束油鹽雜支增鈔二分通作三分經過減半從者每名
支米一升經過減半九月給阿爾哈雅所治之省鋪馬
聖旨十道所轄宣慰司二處各三道 二十二年四月
給陝西行省並各處宣慰司行工部等處鋪馬劄子一
百二十六道 二十三年四月福建東京兩行省各給

圓牌二面鄂囉齊出使交趾先給圓牌二面今再增二面於托歡太子位下給發南京行省起馬三十匹給圓面二面勅立三處宣慰司給劄子起馬三十匹 二十四年四月增給尚書省鋪馬聖旨一百五十道并先給降一百五十道共三百道五月揚州省言徐州至揚州水馬站兩各分置夏月水潦使臣勞苦請徙馬站附併水站一處安置馳驛者白日馬行夜則經由水路况站戶皆是水濱居止者庶幾官民兩便從之七月給中興

路陝西行省廣東宣慰司沙布鼎等官鋪馬聖旨一十
二道 二十五年正月腹裏路分三十八處年銷祇應
錢不敷增給鈔三千九百八十一錠併元額七千一百
六十九錠總中統鈔一萬一千一百五十錠分上下半
年給降二月命南方站戶以糧七十石出馬一匹為則
或十石之下八九戶共之或二十石之上兩三戶共
之惟求稅糧僅足當站之數不至多餘却免其一切雜
泛差役若有納糧百石之下七十石之上自請獨當站

馬一匹者聽之五月增給遼陽行省鋪馬劄子五道十一月福建行省元給鋪馬聖旨二十四道增給劄子六道二十六年正月給光祿寺鋪馬劄子四道二月從沿海鎮守官蔡澤言以舊有水軍二千人於海道置立水站三月給海道運糧萬戶府鋪馬聖旨五道四月四川紹慶路給鋪馬劄子二道成都府六道龍興行省增給鋪馬聖旨五道太原府宣慰司及儲峙提舉司給降二道八月給遼東宣慰司鋪馬聖旨五道大理金齒宣慰

司四道九月增給西京宣慰司鋪馬劄子五道江淮行
省所轄浙東道宣慰司三道紹興路總管府給降二道
甘肅行省所轄額齊訥總管府沙州肅州三路給六道
十一月增給甘肅行省鋪馬聖旨七道 二十七年正
月增給陝西行省鋪馬聖旨五道二月都省增給鋪馬
聖旨一百五十道江淮行省一十五道六月給營田提
舉司鋪馬聖旨二道九月江淮行省所轄徽州路水道
不通給鋪馬聖旨二道 二十八年六月隨處設站官

二員大都至上都置司吏三名餘設二名祇應頭目攢
典各一名站戶及百者設百戶一名七月詔各路府州
縣達嚕噶齊長官依軍戶例兼管展齊鄂羅非奉通政
院明文不得擅科差役十二月增給省除之任官鋪馬
聖旨三百五十道 二十九年三月命通政院分官四
員於江南四省整理展齊給印與之 三十年正月南
丹州洞蠻來朝立安撫司於其地給鋪馬聖旨二道三
月兩淮都轉運鹽使司增給鋪馬聖旨起馬五匹五月

給淘金運司鋪馬聖旨起馬五匹大司農司起馬二十匹六月江浙行省言各路遞運站船若止以六戶供船一艘除苗不過十四五石力寡不能當役請令各路除苗不過元額二十四石自六戶之上或止十戶通融僉撥從之八月給劉二巴圖爾圓牌二面鋪馬聖旨二十五道十月增給濟南府鹽運司鋪馬聖旨一道 三十一年六月給福建運司鋪馬聖旨起馬五匹

成宗大德八年正月御史臺臣言各處展齊合用祇應

官錢多不依時撥降又或數少不給遂令站戶輪當庫
予陪備應辦莫若驗使臣起數實支官錢所在官司依
時撥降令各站提領收掌祇待毋得科配小民似為便
益詔都省定議行之 十年從江浙省言命站官仍領
祇待選站戶之有餘糧者以充庫予止設一名上下半
年更代就准本戶里正主首身役

武宗至大三年五月給嘉興松江瑞州三路及汴梁等
處管民總管府鋪馬聖旨各三道 四年三月詔拘收

各衙門鋪馬聖旨命中書省定議以聞省臣言始者展齊隸兵部後屬通政院今通政院急於整治展齊消乏合依舊命兵部領之制可四月中書省臣又言昨奉旨以展齊屬兵部今右丞相特門德爾等議漢地之驛命兵部領之其特爾根納琳摩琳等處蒙古展齊仍付通政院帝曰何必如此但令罷通政院悉隸兵部可也閏七月復立通政院領蒙古展齊八月詔大都至上都每站除設驛令丞外設提領三員司吏三名腹裏路分衝

要水陸展齊設提領三員司吏三名其餘閒慢驛分止
設提領一員司吏一名如無驛令量擬提領二員每一
百戶設百戶一名從拘該路府州縣提調正官於站戶
內選用三歲為滿凡濫設官吏頭目人等盡罷之十一
月給中政院鋪馬聖旨二十道

仁宗皇慶二年四月增給陝西行臺鋪馬聖旨八道六
月中書省臣言典瑞監掌金字圓牌及鋪馬聖旨三百
餘道至大四年凡聖旨皆納之于翰林院以金字圓牌

不敷增置五十面蓋圓牌遣使初為軍情大事而設不宜濫給自今求給牌面不經中書省樞密院者宜勿與從之 延祐元年十月沙瓜州立屯儲總管萬戶府給鋪馬聖旨六道 五年十月中書兵部言各站設置提領止受部劄行九品印職專軍馬之役所領戶齊多者三二千少者五七百戶比之軍民體非輕細奈何俸祿不給三年一更貪邪得以自縱今擬各處館驛除令丞外見役提領不許交換從之 七年四月詔蒙古漢人

站依世祖舊制悉歸之通政院十一月從通政院官請
詔腹裏江南漢地展齊依舊制命各路達魯噶齊總管
提調州縣官勿得預

泰定元年三月遣官賑給特爾根摩琳納琳等一百一
十九站鈔二十一萬三千三百錠糧七萬六千二百四
十四石八斗北方展齊每加津濟至此為最盛

中書省所轄腹裏各路展齊總計一百九十八處

陸站一百七十五處馬一萬二千二百九十八匹車

一千六十九輛牛一千九百八十二隻驢四千九百
八頭 水站二十一處船九百五十隻馬二百六十
六匹牛二百隻驢三百九十四頭羊五百口 牛站
二處牛三百六隻車六十輛

河南江北等處行中書省所轄總計一百七十九處該
一百九十六站 陸站一百六處馬三千九百二十
八匹車二百一十七輛牛一百九十二隻驢五百三
十四頭 水站九十處船一千五百一十二隻

遼陽等處行中書省所轄總計一百二十處

馬六千五百一十五匹車二千六百二十一輛牛五千二百五十九隻

狗站一十五處元設站戶三百狗三千隻後除絕亡倒死外實在站戶二百八十九狗二百一十八隻

江浙等處行中書省所轄總計二百六十二處

馬站一百三十四處馬五千一百二十三匹 轎站

三十五處轎一百四十八乘 步站一十一處遞運

夫三千三十二戶 水站八十二處船一千六百二十
十七隻

江西等處行中書省所轄總計一百五十四處

馬站八十五處馬二千一百六十五匹轎二十五乘
水站六十九處船五百六十八隻

湖廣等處行中書省所轄總計一百七十三處

陸站一百處馬二千五百五十五匹車七十輛牛五
百四十五隻坐轎一百七十五乘卧轎三十乘水站

七十三處船五百八十隻

陝西行中書省所轄八十一處

陸站八十處馬七千六百二十九匹 水站一處船

六隻

四川行中書省所轄

陸站四十八處馬九百八十六匹牛一百五十頭

水站八十四處船六百五十四隻牛七十六頭

雲南諸路行中書省所轄展齊七十八處

馬站七十四處馬二千三百四十五匹牛三十隻

水站四處船二十四隻

甘肅行中書省所轄三路

托克托和斯馬站六處馬四百九十一匹牛一百四十九頭驢一百七十一頭羊六百五十口

弓手

元制郡邑設弓手以防盜也內而京師有南北兩城兵馬司外而諸路府所轄州縣設縣尉司巡檢司捕盜所

皆置巡軍弓手而其數則有多寡之不同職巡邏專捕
獲官有網運及流徙者至則執兵仗導送以轉相授受
外此則不敢役示專其職焉

世祖中統五年隨州府驛路設置巡馬及馬步弓手驗
民戶多寡定立額數除本管頭目外本處長官兼充提
控官其夜禁之法一更三點鐘聲絕禁人行五更三點
鐘聲動聽人行有公事急速及喪病產育之類則不在
此限違者笞二十七下有官者笞七下准贖元寶鈔一

貫州縣城池相離遠處其間五七十里所有村店及二十戶以上者設立巡防弓手合用器仗必須完備令本縣長官提調不及二十戶者依數差捕若無村店去處或五七十里創立聚落店舍亦須及二十戶數其巡軍別設不在戶數之內關津渡口必當設立店舍弓手去處不在五七十里之限於本路不以是何投下當差戶計及軍站人匠打捕鷹房鄂拓克窩冶諸色人戶內每一百戶內取中戶一名充役與免本戶合着差發其當

戶推到合該差發數目却於九十九戶內均攤若有失盜勒令當該弓手定立二限盤捉每限一月如限內不獲其捕盜官強盜停俸兩月竊盜一月外據弓手如一月不獲強盜決二十七下竊盜七下兩月不獲強盜二十下竊盜一十七下三月不獲者強盜三十七下竊盜二十七下如限內獲賊數及一半者全免正罪至元三年省部議隨路戶數多寡不同兼軍站不該差發似難均攤擬合斟酌京府司縣合用人數止於本處包銀

絲線并止納包銀戶計內每一百戶選差中戶一名當役本戶合當差發稅銀却令九十九戶包納從之四年除上都中都已有巡軍其所轄州縣合設弓手俱於本路包銀等戶選丁多強壯者充驗各處州縣戶數多寡驛程緊慢設置合用器仗各人自備八年御史臺言諸路宜選年壯熟閑弓馬之人以備巡捕之職弓手數少者亦宜增置除捕盜防轉不得別行差占十六年分大都南北兩城兵馬司各主捕盜之任南城三十二處弓

手一千四百名北城一十七處弓手七百九十五名二十三年省臺官言捕賊巡馬先令執持悶棍以行賊衆多有弓箭反致巡軍被傷今議給各路弓箭十副府州七副司縣五副各令置備防盜從之仁宗延祐二年從江南行御史臺請以各處弓手人等往往致害人命役三年者罷之還當民役別於相應戶內補換

急遞鋪兵

古者置郵而傳命示速也元制設急遞鋪以達四方文

書之往來其所繫至重其立法蓋可考焉世祖時自燕
京至開平府復自開平府至京兆始驗地里遠近人數
多寡立急遞站鋪每十里或十五里二十五里則設一
鋪於各州縣所管民戶及漏籍戶內僉起鋪兵中統元
年詔隨處官司設傳遞鋪驛每驛置鋪丁五人各處縣
官置文簿一道付鋪遇有轉遞文字當傳鋪所即注名
件到鋪時刻及所轄轉遞人姓名置簿令轉送人取下
鋪押字交收時刻還鋪本縣官司時復點刷稽滯者治

罪其文字本縣官司絹袋封記以牌書號其牌長五寸
濶一寸五分以綠油黃字書號若係邊關急速公事用
匣子封鎖於上重別題號及寫某處文字發遣時刻以
憑照勘遲速其匣子長一尺闊四寸高三寸用黑油紅
字書號已上牌匣俱係營造小尺上以千字文為號仍
將本管地境置立鋪驛卓望地名遞相傳報鋪兵一晝
夜行四百里各路總管府委有俸正官一員每季親行
提點州縣亦委有俸末職正官上下半月照刷如有怠

慢初犯事輕者笞四十贖銅再犯罰俸一月三犯者決
總管府提點官比總管減一等仍科三十初犯贖銅再
犯罰俸半月三犯者決鋪兵鋪司痛行斷罪至元八年
申命州縣官用心照刷及點視闕少鋪司鋪兵凡有遞
轉文字到鋪司隨即分明附籍速令當該鋪兵裹以軟
絹包袱更用油絹捲縛夾版束繫齎小回歷一本作急
走遞到下鋪交割附歷訖於回歷上令鋪司驗到鋪時
刻并文字總計角數及有無開拆磨擦損壞或亂行批

寫字樣如此附寫一行鋪司畫字回還若有違犯易為
挨問隨路鋪兵不許顧人領替須要本戶少壯人力正
身應役每鋪安置十二時輪予一枚紅綽屑一座并牌
額及上司行下諸路申上鋪歷二本每遇夜常明燈燭
其鋪兵每名備夾版鈴攀各一付纓槍一軟絹包袱一
油絹三尺簑衣一領回歷一本各處往來文字先用淨
檢紙封裹於上更用厚夾紙印信封皮各路承發文字
人吏每日逐旋發放及將承發到文字驗視有無開拆

磨擦損壞批寫字樣分朗附簿九年左補闕祖里法罕
言諸路急遞鋪名不合人情急者急速也國家設官署
名字必須吉祥者為美宜更定之遂更為通遠鋪二十
年留守司官言初立急遞鋪時取不能當差貧戶除其
差發充鋪兵又不敷者於漏籍戶內貼補今富人規避
差發永充鋪兵乞擇其富者令充站戶站戶之貧者却
充鋪兵從之二十八年中書省定議近年入遞文字封
緘雜亂發遣無時今後省部并諸衙門入遞文字其常

事皆付承發司隨所投下去處類為一緘如往江淮行
省者凡江淮行省不以是何文字通為一緘其他官府
同省部臺院凡有急速之事別置匣子發遣其匣子入
遞隨到即行鋪司須能附寫文歷辨定時刻鋪兵須壯
健善走者不堪之人隨即易換三十一年大都設置總
急遞鋪提領所降九品銅印設提領三員英宗至治三
年各處急遞鋪每十鋪設一郵長於州縣籍記司吏內
差充使之專督其事一歲之內能盡職者從優補用不

能者提調官量輕重罪之凡鋪卒皆腰革帶懸鈴持槍
挾雨衣齋文書以行夜則持炬火道狹則車馬者負荷
者聞鈴避諸旁夜亦以驚虎狼也響及所之鋪則鋪人
出以俟其至囊板以護文書不破碎不襍積摺小漆絹
以禦雨雪不使濡濕之及各鋪得之則又展轉遞去

鷹房捕獵

元制自御位及諸王皆有實保齊蓋鷹人也是故捕獵
有戶使之致鮮食以薦宗廟供天庖而齒革羽毛又皆

足以備用此殆不可闕焉者也然地有禁取有時而違者則罪之冬春之交天子或親幸近郊縱鷹隼搏擊以爲游豫之度謂之飛放故鷹房捕獵皆有司存而打捕鷹房人戶多取析居放良及漏籍布疋齊還俗僧道與凡曠役無賴者及招收亡宋舊役等戶爲之其差發除納地稅商稅依例出軍等六色宣課外並免其雜泛差役自太宗乙未年抄籍分屬御位下及諸王公主駙馬各投下及世祖時行尚書省嘗重定其籍厥後永爲定

制焉

御位下打捕鷹房官 一所權官張元大都路寶坻縣

置司元額七十七戶 一所王阿都齊世襲祖父職

掌十投下中都順天真定宣德等路諸色人匠打捕

等戶元額一百四十七戶 一所管領大都等處打

捕鷹房民戶達魯噶齊舒穆魯額森世襲祖父職元

額一百一十七戶 一所管領大都路打捕鷹房等官

李托歡特穆爾世襲祖父職元額一百二十八戶

一所宣授管領大都等處打捕鷹房人匠等戶達魯噶齊黃伊蘇岱爾世襲祖父職元額五十戶 一所管領鷹房打捕人匠等戶達魯噶齊伊喇特木爾世襲祖父職元額一百五十七戶 一所宣授管領打捕鷹房等戶達魯噶齊阿巴齊世襲祖父職元額三百五十五戶 一所宣授管領大都等路打捕鷹房人戶達魯噶齊哈沙世襲祖父職元額二百四十三戶

諸王位下 汝寧王位下管領民匠打捕鷹房等戶官
元額二百一戶 保賽音大王位下管領本投下大
都等路打捕鷹房諸色人匠達魯噶齊都總管府元
額七百八十戶

天下州縣所設獵戶 腹裏打捕戶總計四千四百二
十三戶 河東宣慰司打捕戶五百九十八戶 晉
寧路打捕戶三百三十二戶 大同路打捕戶一十
五戶 冀寧路打捕戶二百五十一戶 上都留守

司打捕戶三百九十七戶 宣德提領所打捕戶一

百八十二戶 山東宣慰司打捕戶三百九十七戶

宣德提領所打捕戶一百八十二戶 山東宣慰司

打捕戶一百戶 益都路打捕戶四十三戶 濟南

路打捕戶三十六戶 般陽路二十一戶 東平路

三十四戶 曹州八十四戶 德州一十戶 濮州

三十一戶 泰安州五戶 東昌路一戶 真定路

九十一戶 順德路一十九戶 廣平路十九戶

冠州五戶 恩州二戶 彰德三十七戶 衛輝路

一十六戶 大名路二百八十六戶 保安路三十

一戶 河間路二百五十二戶 隨路提舉司一千

一百九十一戶 河間鷹房府二百七十六名 都

總管府七百五十六戶

遼陽大寧等處打捕鷹房官捕戶七百五十九戶

東平等路打捕鷹房官捕戶三百九戶 隨州德安

河南襄陽懷孟等處打捕鷹房官捕戶一百七十二

戶 叔捕提領所捕戶四十戶 高麗鷹房總管

捕戶二百五十戶 河南等路打捕鷹房官捕戶一

千一百四十二戶 益都等處打捕鷹房官捕戶五

百二十一戶 河北河南東平等處打捕鷹房官捕

戶三百戶 隨路打捕鷹房總管捕戶一百五十九

戶 真定保定等處打捕鷹房官捕戶五十戶 淮

安路鷹房官捕戶四十七戶 揚州等處打捕鷹房

官捕戶七十二戶

宣徽院管轄淮東淮西屯田打捕總管府司屬打捕

衙門提舉司十處千戶所一處總一萬四千三百二

戶 淮安提舉司八百五十八戶 安東提舉司九

百一十二戶 招泗提舉司四百六十五戶 鎮巢

提舉司二千五百四十戶 蘄黃提舉司一千一百

一十二戶 通泰提舉司七百四十九戶 塔山提

舉司六百四十四戶 魚網提舉司二千五百一十

九戶 打捕手號軍上千戶所打捕軍六百四戶

元史卷一百一

元史卷一百一考證

太宗元年北使臣每日支肉一斤麪一斤 按北字舊

訛比據永樂大典本改

遼陽等處行中書省所轄陸站一百五處 按舊本脫

陸站一百五處六字據經世大典補

四川行中書省所轄 按此條獨無總數以下文計之
當為一百三十二處

欽定四庫全書薈要卷六千四百八十一 史部

元史卷一百二

明翰林學士亞中大夫知制誥兼修國史宋濂等修

志第五十

刑法一

自古有天下者雖聖帝明王不能去刑法以為治是故
道之以德義而民弗從則必律之以法法復違焉則刑
辟之施誠有不得已者是以先王制刑非以立威乃所

以輔治也故書曰士制百姓于刑之中以教祇德後世
專務黷刑任法以為治者無乃昧於本末輕重之義乎
歷代得失考諸史可見已元興其初未有法守百司斷
理獄訟循用金律頗傷嚴刻及世祖平宋疆理混一由
是簡除繁苛始定新律頒之有司號曰至元新格仁宗
之時又以格例條畫有關於風紀者類集成書號曰風
憲宏綱至英宗時復命宰執儒臣取前書而加損益焉
書成號曰大元通制其書之大綱有三一日詔制二曰

條格三曰斷例凡詔制為條九十有四條格為條一千

一百五十有一斷例為條七百十有七大槩纂集世祖

以來法制事例而已其五刑之目凡七下至五十七謂

之笞刑凡六十七至一百七謂之杖刑其徒法年數杖

數相附麗為加減鹽徒盜賊既決而又鐐之流則南人

遷於遼陽迤北之地北人遷於南方湖廣之鄉死刑則

有斬而無絞惡逆之極者又有凌遲處死之法焉蓋古

者以墨劓剕宮大辟為五刑後世除肉刑乃以笞杖徒

流死備五刑之數元因之更用輕典蓋亦仁矣世祖謂
宰臣曰朕或怒有罪者使汝殺汝勿殺必遲回一二日
乃覆奏斯言也雖古仁君何以過之自後繼體之君惟
刑之恤凡郡國有疑獄必遣官覆讞而從輕死罪審錄
無冤者亦必待報然後加刑而大德間王約復上言國
朝之制笞杖十減為七今之杖一百者宜止九十七不
當又加十也此其君臣之間唯知輕典之為尚百年之
間天下又寧亦豈偶然而致哉然其弊也南北異制事

類繁瑣挾情之吏舞弄文法出入比附用譎行私而兇
頑不法之徒又數以赦宥獲免至於西僧歲作佛事或
恣意縱囚以售其奸宄俾善良者喑啞而飲恨識者病
之然則元之刑法其得在仁厚其失在乎緩弛而不知
檢也今按其實條列而次第之使後世有以考其得失
作刑法志

名例

五刑

笞刑

七下

十七

二十七

三十七

四十七

五十七

杖刑

六十七

七十七

八十七

九十七

一百七

徒刑

一年

杖六十七

一年半

杖七十七

二年

杖八十七

二年半

杖九十七三年

杖一百七

流刑

遼陽

湖廣

迤北

死刑

斬

凌遲處死

五服

斬衰

三年

子為父婦為夫之父之類

齊衰

三年

杖期

期

五月

三月

子為母婦為夫之母之類

大功

九月

長殤九月

中殤七月

為同堂兄弟為姑姊妹適人者之類

小功

五月

殤

為伯叔祖母為再從兄弟之類

緦麻

三月

為族兄弟為族曾祖父母之類

十惡

謀反

謂謀危社稷

謀大逆

謂謀毀宗廟山陵及宮闕

謀叛

謂謀背國從偽

惡逆

謂毆及謀殺祖父母父母殺伯叔父母姑兄弟外
祖父母夫夫之祖父母父母者

不道

謂殺一家非死罪三人及支解人造畜蠱毒魘魅
大不敬

謂盜大祀神御之物乘輿服御物盜及偽造御寶
合和御藥誤不如本方及封題誤若造御膳誤犯
食禁御幸舟船誤不牢固指斥乘輿情理切害及

對捍制使而無人臣之禮

不孝

謂告言詛詈祖父母父母及祖父母父母在別籍
異財若供養有闕居父母喪身自嫁娶若作樂釋服
從吉聞祖父母父母喪匿不舉哀詐稱祖父母父母死
不睦

謂謀殺及賣總麻以上親毆告夫及大功以上尊
長小功尊屬

不義

謂殺本屬府主刺史縣令見受業師吏卒殺本部
五品以上官長及聞夫喪匿不舉哀若作樂釋服
從吉及改嫁

內亂

謂姦小功以上親父祖姦及與和者

八議

議親

謂皇帝袒免以上親及太皇太后皇太后總麻以上親皇后小功以上親

議故

謂故舊

議賢

謂有大德行

議能

謂有大才業

議功

謂有大功勲

議貴

謂職事官三品以上散官二品以上及爵一品者

議勤

謂有大勤勞

議賓

謂承先代之後為國賓者

贖刑附

諸牧民官公罪之輕者許罰贖

諸職官犯夜者贖

諸年老七十以上年幼十五以下不任杖責者贖

諸罪人癰疽殘疾有妨科決者贖

衛禁

諸掌宿衛三日一更直掌四門之鑰昏閉晨啟毋敢不
慎 諸欲言事人闌入宮殿呼冀上聞杖一百七發元

籍 諸擅帶刀闖入殿庭者杖八十七流遠 諸登皇城
角樓因為盜者處死 諸闖入禁衛盜金玉寶器者處
死 諸輒入禁苑盜殺官獸者為首杖八十七徒二年為
從減一等並刺字知見不首者笞四十七掌門衛受財
縱放者五十七坐鋪守把軍人不訶問二十七 諸漢
人南人投充宿衛士總宿衛官輒收納之並坐罪 諸
大都上都諸城門夜有急務須出入者遣官以夜行象
牙圓符及織成聖旨啓門門尉辨驗明白乃許啓雖有

牙符而無織成聖旨者不論何人並勿啓違者處死

職制上

諸官府印章長官掌收次官封之差故即以牒發次官次其下者第封之不得付其私人 諸郡縣城門鎖鑰

並從有司掌之 諸有司凡薦舉刑名出納等文字非有故並須圖署行之 諸職官到任距上司百里之內者公參百里之外者免上司輒非理微會稽失公務者禁之 諸內外百司呈署文字並須由下而上論定而

後行之 諸省府以下百司凡行公務置朱銷簿按治
官以時考之 諸職官公坐同職者以先到任居上輒
越次而坐者正之 諸有司公事各官連銜申稟其上
司者並自書其名有故從對讀首領官代書之具述其
故於名下曹吏輒代書其名者罪之 諸職官受代聽
除之處從所便具載解由私赴都者禁之 諸有司案
牘籍帳編次架閣各路提控案牘兼架閣庫官與經歷
知事同掌之散府州縣知事提控案牘都吏目典史掌

之任滿相沿交割毋敢不慎 諸樞密院行省文卷除

軍數及邊關兵機不在考閱餘並從監察御史考閱之

諸職官承上司他委所治闕官者許回申不得擅令

首領官吏攝事 諸職官押運官物赴都除常所不差

者餘並置籍輪差徇私不均者罪其上司 諸吏員遷

調廉訪司書吏奏差避道路府州縣吏避貫 諸有司

遺失印信隨即尋獲者罰俸一月追尋不獲者具申禮

部別鑄元掌印官解職坐罪非獲元印不得給由求敘

諸毀匿邊關文字者流 諸蒙古人居官犯法論罪

既定必擇蒙古官斷之行杖亦如之 諸四集賽及諸

王駙馬蒙古色目之人犯姦盜詐偽從大宗正府治之

諸以親女獻當路權貴求進用已得者追奪所受命

仍沒入其家 諸官吏在任與親戚故舊及理應追往

之人追往者聽餘並禁之 諸職官到任輒受所部贄

見儀物比受贓減等論 諸職官受部民事後致謝食

用之物者答二十七記過 諸上司及出使官於使所

受其燕饗餽遺者准不枉法減二等論經過而受者各減一等從臺憲察之

諸職官及有出身人因事受財枉法者除名不敘不枉法者殿三年再犯不敘無祿者減一等以至元鈔為則枉法一貫至十貫笞四十七不滿貫者量情斷罪依例除名一十貫以上至二十貫五十七二十貫以上至五十貫杖七十七一百貫以上一百七不枉法一貫至二十貫笞四十七本等敘不滿貫者量情斷罪解見任別行求仕二十貫以上至五十貫

五十七注邊遠一任五十貫以上至一百貫杖六十七
降一等一百貫以上至一百五十貫七十七降二等一
百五十貫以上至二百貫八十七降三等二百貫以上
至三百貫九十七降四等三百貫以上一百七除名不
敘諸內外百司官吏受賊悔過自首無不盡不實者
免罪有不盡不實止坐不盡之賊若知人欲告而首及
以贓還主並減罪二等聞知他處事發首者計其日程
雖不知亦以知人欲告而首論詭名代首者勿聽犯人

實有病故許親屬代首臺憲官吏受贓不在准首之限
有司受人首告者罪之 諸職官恐嚇有罪人求賂未
得財者答二十七 諸告官吏贓有實取之者有為過
度人所諱而官吏初不知者有官吏已知而姑付過度
之家事畢而後取之者有本未嘗言而故以錢物寘人
家指作過度而誣陷人者止以錢物所在坐之與錢人
俱坐 諸職官但犯贓私有罪狀明白者停職聽斷
諸奴賤為官但犯贓罪除名 諸職官犯贓生前贓狀

明白雖死猶責家屬納贓

諸官吏犯贓罪遇原免或

自首免罪過錢人即因人致罪不坐

諸官吏贓罰臺

官問者歸臺省官問者歸省

諸職官犯贓罪狀已明

反誣告臨問官者斷後仍徒

諸官吏家人受贓減官

吏法二等坐官吏初不知及知即首官吏家人俱免不

即首官吏減家人法二等坐家人依本法若官吏知情

故令家人受財官吏依本法家人免坐官吏實不知者

止坐家人

諸職官受除未任因承差而犯贓者同見

任論邊遠遷轉官已任而未受文憑犯賊者亦如之吏

未出職受賊既出職事發罷所受職 諸錢穀官吏受

賊不枉法者止計賊論罪不殿年敘 諸職官受賊聞

知事發回付到主同知人欲告自首論減二等科罪枉

法者降先職三等敘不枉法者解職別敘 諸職官侵

用官錢者以枉法論雖會赦仍除名不敘 諸職官在

任犯賊被問賊狀已明而稱疾者停其職歸對 諸職

官所將親屬僣從受所部財而無入已之賊會赦還職

諸外任牧守受贓被問垂成近臣奏徵入朝者執付
元問官 諸職官犯贓在逃者同獄成 諸職官受贓
丁憂終制日究問軍官不丁憂者不在終制之限 諸
職官犯贓已承伏會赦者免罪徵贓黜降如條未承伏
者勿論 諸職官受贓即改悔還主其主猶執告者勿
論 諸職官受財為人請託者計贓論罪 諸小吏犯
贓並斷罪除名 諸庫子等職已有出身無添給祿米
者不與小吏犯贓同論 諸掾吏出身應入流或以職

官轉補但犯賊並同吏員坐除名府州縣首領官非朝

命者同吏員 諸吏員取受非真犯者不除名 諸流

外官越受民詞者答一十七首領官二十七記過 諸

臨民官於無職田州縣虛徵其入於民者斷罪解職記

過 諸職官頻入茶酒市肆及倡優之家者斷罪罷職

諸監臨官私役弓手答二十七三名以上加一等占

騎弓手馬答一十七並記過各本管官吏輒應付者各

減一等 諸内外官吏疾病滿百日者作闕期年後仕

諸職官連犯二罪輕罪已斷重罪始發罪從已斷殿
降從後發 諸有過被問詐死逃罪者杖六十七有官
者罷職不敘賊多者從重論 諸行省以下大小司存
長官非理折辱其首領官者禁之首領官有過失聽申
上司不得擅問長官處決不公首領官執覆不從許直
申上司 諸隨朝官無故不公聚者坐罪選待 諸職
官已受宣勅以地遠官卑輒稱故不赴者奪所受命謫
種田或在任詐稱病而去者三年後降二等敘其同僚

徇私與文書者降一等敘

諸受命職官闕期已及或

有辨證勾稽喪葬疾病公私諸務妨阻不能之任者許具始末詣本處有司自陳保勘給據再敘並任元注地方有司保勘不實者並坐之 諸受除官員闕次未及

輒先往任所居住守代者從本管上司究之 諸各衙

門輒將聽除及罷閑無祿私已之人差遣者禁 諸職

官親死不奔喪杖六十七降先職二等雜職敘未終喪赴官答四十七降一等終制日敘若有罪詐稱親喪杖

八十七除名不敘親久沒稱始死答五十七解見任雜
職敘凡不丁父母憂者罪與不奔喪同 諸官吏私罪
被逮無問已招未招罹父母大故者聽其奔赴丁憂終
制日追問公罪並矜恕之 諸職官父母亡匿喪縱宴
樂遇國哀私家設音樂並罷不敘 諸外任官員謁告
應有假故具曹狀報所屬仍置籍以記之有託故者風
憲官糾而罪之 諸官吏遷葬祖父母父母給假二十
日並除馬程日七十里限內俸錢仍給之違限不至者

勒停 諸職官任滿解由應給而不給不應給而給及
有過而不開寫者罪及有司解由到部增損功罪不以
實者亦如之 諸罷免官吏敘復給由而匿其過名者
罪及初給由有司 諸匿過求仕已除事覺者笞四十
七追奪不敘 諸職官年及致仕而不知止者廉訪司
糾黜之 諸職官被罪理算殿年以被問停職月日為
始 諸遠方官員親年七十以上者許元籍有司保勘
量注近闕便養冒濫者坐罪 諸職官沒於王事者其

應繼之人降二等蔭敘 諸內外百司五品以上進上

表章並以蒙古字書毋敢不敬仍以漢字書其副 諸

內外百司凡進賀表箋繕寫謄籍印識各以式其輒犯

廟諱御名者禁之 諸內外百司應出給劄付有額設

譯史者並以蒙古字書寫 諸內外百有無設以蒙古

回回譯史者每遇行移及勘合文字標譯關防仍兼用

之 諸內外百司公移尊卑有序各守定制惟執政出

典外郡申部公文書姓不書名 諸人臣口傳聖旨行

事者禁之 諸大小機務必由中書惟樞密院御史臺
徽政宣政諸院許自言所職其餘不由中書而輒上聞
既上聞而又不由中書徑下所司行之者以違制論所
司亦不稟白而輒受以行之者從監察御史廉訪司糾
之 諸中書機務有泄其議者量所泄事聞奏論罪
諸省部官名隸宿衛者晝出治事夜入番直 諸檢校
官勾檢中書及六曹之務其有稽違省掾呈省論罰部
吏就錄罪名開呈 諸行省擅役軍人營繕雖公廨不

奏請猶議罪 諸行省差使軍官非軍情者禁之 諸

行省長官二員給金虎符典軍惟雲南行省官皆給符

諸各處行省所轄軍官軍情怠慢從提調軍馬長官

斷遣其餘雜犯受宣官以上洛稟受勅官以下就斷

諸行省歲支錢糧各處行官季一照勘歲終會其成于

行省以式稽考濫者徵之實者籍之總其槩洛都省臺

憲官閱實之 諸方面大臣受金縱賊成亂者斬僚佐

受金或阿順不能匡正並生罪會赦仍除名 諸樞密

院及各省所部軍官其麾下征者戍者出者處者饑寒
不贍役使不均代以私人舉債倍息在家曰逃有力曰
乏惟單窮是使惟貨賄是圖以苦士卒以耗兵籍百戶
有罪罪及千戶千戶有罪罪及萬戶萬戶有罪從樞密
院及行省帥府以其狀聞隨事論罪 諸宣徽院所抽
分馬牛羊官嚴其程期制其供億謹其鈐束之法以談
察之其有欺官擾民者廉訪司糾之 諸翰林院應譯
寫制書必呈中書省共議其豪其文卷非邊遠軍情重

事並從監察御史考閱之 諸宣政院文卷除修佛事

不在照刷外其餘文卷及所隸內外司存並照刷之

諸徽政院及齊哩克昆人舊設諸府司文卷並從臺

憲照刷 諸臺官職掌飭官箴稽吏課內秩羣祀外察

行人與聞軍國奏議理達民庶冤詞凡有司刑名賦役

銓選會計調度徵收營繕鞠勘審讞勾稽及庶官廉貪

厲禁張弛編民惇獨流移強暴兼并悉糾舉之 諸行

臺官主察行省宣慰司已下諸軍民官吏之作姦犯科

者窮民之流離失業者豪强家之奪民利者按察官之不稱職任者餘視內臺立法同 諸御史臺所轄各道憲司民有冤滯赴愬于臺者咸著于籍歲終則會以考其各道之殿最而黜陟之 諸臺憲所察天下官吏賊汚欺詐稽違罪入于刑書者歲會其數及其罪狀上之藏于中書 諸內外臺歲遣監察御史刷磨各省文卷并察各道廉訪司官吏臧否官弗稱者呈臺黜罰吏弗稱者就罷之 諸風憲薦舉必考其最績彈劾必著其

罪狀舉劾失當並坐之 諸殿中侍御史凡遇廷臣奏

事必隨入內在廷有不可與聞之人即糾斥之朝會祭祀一切行禮失儀越次及托故不至者即糾罰之文武百官謁假事故三日以外者以曹狀報之凡官府勅置百官禮任及被差往還報曹狀並同 諸廉訪分司官每季孟夏初旬出錄因中秋中旬出按治明年孟夏中旬還其憚遠違期託故避事者從監察御史劾之 諸廉訪司分巡各路軍民官吏有過得罪狀明白者六品

以下牒總司論罪五品以上申臺間奏 諸廉訪司官

擅封點軍器庫者答三十七解職別敘 諸官吏受贓

事主雖不告言監察御史廉訪司察之實者糾之 諸

行省官及首領官受賂隨省廉訪司察知者上之臺已

下就問 諸行省理問所見問公事廉訪司輒逮問者

禁之 諸職官受贓廉訪司必親臨聽決有必不能親

臨者摘敵品有司老成廉能正官問之 諸被按官吏

有冤抑者詣御史臺陳理所言實罪被告所言虛罪告

者仍加等其有故撫按問官吏以事者禁之 諸按問

職官贓毋遽施刑惟衆證已明而不款伏者加刑問之

軍官則先奪所佩符而問之 諸風憲官吏但犯贓加

等斷罪雖不枉法亦除名 諸方面之臣入覲輒斂所

部官吏俸錢備禮物者禁之違者罪之 諸湖南北江

西兩廣接境溪洞蠻獠竊發諸監臨禁治不嚴及故縱

者軍官笞三十七管民官二十七並劄所受階一等記

過 諸邊隅鎮守不嚴他盜輒入境殺掠者軍官坐罪

民官不生 諸軍民官鎮撫邊陲三年無嘯聚之盜者民
官減一資軍官陞散官一階五年無者軍民官各陞散
官一等 諸郡縣版籍所司謹度置之正官相沿掌之
諸勸農官每歲終則上其所治農桑水利之成績于
本屬上司本屬上司會所部之成績以上于大司農若
部部考其勤惰成否以上于省而殿最之其在官怠其
事隳其法者罪之 諸職官行田受民戶齊斂錢者以
一多科斷 諸受財占民差徭者以枉法論 諸額課

所在管民正官董其事若以他故出次官通攝之 諸

額收錢糧各處計吏歲一詣省會之有齊斂者從按治

官舉劾 諸郡縣歲以三限徵收稅糧初限十月終中

限十一月終末限十二月終違者初限笞四十再犯杖

八十但結攬及自願與結攬人等並沒入其家財仍依

元科之數倍徵之若不差正官部糧而以權官部之或

致失陷及輸不足者達嚕噶齊管民官同坐 諸州縣

義倉糧數不實監臨失舉察者罪之 諸職官於禁刑

之日決斷公事者罰俸一月吏笞二十七記過 諸有

司斷諸小罪輒以杖頭非法杖人致死罪坐判署官吏
諸曾訴官吏之人有罪其被訴官吏勿推 諸有司

輒憑妄言帷薄私事逮繫人者笞四十七解職期年後
敎 諸職官得代及休致凡有追奪並同見任其婚姻
田債諸事止於子孫弟侄陳訴有司輒相侵凌者究之
諸職官告吏民毀罵非親聞者勿問違者罪之 諸

職官聽訟者事關有服之親并婚姻之家及曾受業之

師與所讐嫌之人應迴避而不迴避者各以其所犯坐之有輒以官法臨決尊長者雖會赦仍解職降敘諸有司事關蒙古軍者與管軍官約會問諸管軍官鄂囉官及鹽運司打捕鷹坊軍匠各投下管領軍色人等但犯強竊盜賊偽造寶鈔畧賣人口發冢放火犯姦及諸死罪並從有司歸問其鬪訟婚田良賤錢債財產宗從繼絕及科差不公自相告言者從本管理問若事關民戶者從有司約會歸問並從有司追逮三約不至者

有司就便歸斷 諸州縣鄰境軍民相關詞訟元告就

被論官司歸斷不在約會之例斷不當理許赴上司陳

訴罪及元斷官吏 諸僧道儒人有爭有司勿問止令

三家所掌會問 諸哈達大師止令掌教念經回回人

應有刑名戶婚錢糧詞訟並從有司問之 諸僧人但

犯姦盜詐偽致傷人命及諸重罪有司歸問其自相爭

告從各寺院住持本管頭目歸問若僧俗相爭田土與

有司約會約會不至有司就便歸問 諸各寺院稅糧

除前宋所有常住及世祖所賜田土免納稅糧外已後
諸人布施并已力典買者依例納糧 諸管民官以公
事攝所部並用信牌其差人擾衆者禁之 諸掩骼埋
胔有司之職或饑歲流莩或中路暴死無親屬收認應
聞有司檢覆者檢覆既畢就付地主鄰人收葬不須檢
覆者亦就收葬 諸救災卹患鄰邑之禮歲饑輒閉糴
者罪之 諸郡縣災傷過時而不申或申不以時及按
治官不以時檢踏皆罪之 諸蟲蝗為災有司失捕路

官各罰俸一月州官各答一十七縣官各二十七並記
過 諸水旱為災人民艱食有司不以時申報賑卹以
致轉徙饑莩者正官答三十七佐官二十七各解見任
降先職一等敘 諸有司檢覆災傷或以熟作荒或以
可救為不可救一頃已上者罰俸二十頃已上者答一
十七二百頃已上者答二十七五百頃已上者答三十
七惟以荒作熟抑民納糧者答四十七罷之託故不行
妨誤檢覆者答三十七 諸義夫節婦孝子順孫節行

應旌表者從所屬有司舉之監察御史廉訪司察之但

有冒濫罪及元舉 諸賜高年帛應受賜而有司不以

實報者正官答四十七解職別敘 諸州縣舉茂異秀

才非經監察御史廉訪司體察者不得開申 諸民犯

弑逆有司稱故不聽理者杖六十七解見任殿三年雜

職敘 諸檢屍有司故遷延及檢覆牒到不受以致屍

變者正官答三十七首領官吏各四十七其不親臨或

使人代之以致增減不實移易輕重及初覆檢官相符

同者正官隨事輕重論罪黜降首領官吏各笞五十
罷之作作行人杖七十受財者以枉法論 諸有司
在監囚人因病而死虛立檢屍文案及關覆檢官者正
官笞三十七解職別敘已代會赦者仍記其過 諸職
官覆檢屍傷屍已焚瘞止傳會初檢申報者解職別敘
若已改除仍記其過 諸藩王及軍馬經過郡縣委積
館勞並許於應給官物內支遣隨申行省知會或擅移
易齊斂者禁之 諸郡縣非遇聖旨令旨諸王駙馬大

臣經過官吏並免郊外妨奪公務仍不得贖以錢物按
治官常糾察之 諸職官但犯軍情違誤受勅官各路
就斷受宣官從都省行省處分其餘公罪各路並不得
輒斷 諸部送囚徒中路所次州縣不寄囚於獄而監
收旅舍以致反禁而亡者部送官答三十七還職本處
防護官答四十七就責捕賊仍通記過名 諸有司各
處遞至流囚輒主意故縱者杖六十七解職降先品一
等敘刑部記過 諸和顧和買依時置估對物給價官

吏權豪因緣結攬營私害公者罪之 諸有司和買諸

物多餘估計分受其價者準盜官錢論不分受以冒估
多寡論監臨及當該官吏詭名中納者物價全沒之尅
落價鈔者準不枉法贓論不即支價者臺憲官糾之

諸職官輒以親故人事之物為散之民鳩斂錢財者計
其時直以餘利為坐減不枉法贓二等科罪錢物各歸
其主 諸職官私用民力者笞二十七記過追顧直給
其民 諸尅除所屬官吏俸錢為公用及備進上禮物

既去職者並勿論 諸在任官斂屬吏俸贈去官者筭
四十七還職 諸職官輒借騎所部內驛馬者筭三十
七降先職一等敘記過 諸職官於所部非親故及理
應往復之家輒行慶吊之禮者禁之違者罪之

元史卷一百二

元史卷一百二考證

刑法志一諸官吏在任與親戚故舊及理應追往之人
追往者聽餘並禁之按至正條格至元三十一年
定諸官吏在任部下情禮數條親戚故舊及理應追
往之人外餘皆禁止如違隨其輕重斟酌追斷原刻
理訛禮今據改

欽定四庫全書薈要卷六千四百八十二

吏部

元史卷一百三

明翰林學士亞中大夫知制誥兼修國史宋濂等修

志第五十一

刑法二

職制下

諸職官戶在軍籍管軍官輒追逮其身者禁之 諸中外大小軍官不能以法撫循軍人而又害之者從監察

御史廉訪司糾察之行省官及宣慰司元帥府官無故以軍官自衛者亦如之 諸軍官不法各處憲司就問之樞府不得委官同問 諸管軍官輒以所佩金銀符充典質者答五十七降散官一等受質者減二等 諸軍官犯贓應罷職殿降者上所佩符再敘日給之 諸軍官役使軍人萬戶八名千戶減萬戶之半彈壓減千戶之半過是數者坐罪 諸軍官驅役軍人致死非命者量事斷罪並罷職徵燒埋銀給苦主 諸管軍官擅

放正軍及分受雇役錢者以枉法論除名不敘 諸管

軍官吏尅除軍人衣糧鹽菜錢并全未給散會赦尅除
已招者追給未招者免徵未給散者給散其私役軍人
官牛帶種官地并管民官占種官地所收子粒已招者
追沒未招者免徵 諸軍官役其出征軍人家屬又借
之錢而多取息者並坐之 諸軍官輒縱軍人誣民以
罪嚇取錢物而分贓自厚者計贓科罪除名不敘 諸
民間失火鎮守軍官坐視不救而反縱軍剽掠者從臺

憲官糾之 諸軍官輒斷民訟者禁之違者罪之 諸

軍官挾仇犯分輒持刃欲殺連帥者杖六十七解職別

敘 諸投下官吏受贓與常選官同論 諸投下雜職

犯贓罪者罷之不以常調殿降論 諸投下妄稱上旨

影占民站除其徭役故縱為民害者杖七十七沒其家

財之半所占民杖一百七還元籍 諸王傳文卷監察

御史考閱與有司同 諸位下置財賦營田等司歲終

則會會畢從廉訪司考閱之 諸投下輕重囚徒並從

廉訪司審錄 諸藩邸事務大者奏裁小者移中書擅

以教令行者禁之 諸倉庾官吏與府州司縣官吏人

等以百姓合納稅糧通同攬納接受折價飛鈔者十石

以上各刺面杖一百七十石以下九十七官吏除名不

敘退閑官吏豪勢富戶行銷人等違犯者十石之上杖

九十七七十石之下八十七其部糧官吏知情分受笞五

十七除名不敘有失覺察者監臨部糧官吏二十七府

州總部糧官吏一十七若能捕獲犯人者與免本罪若

倉官人吏等盜糶官糧與攬納飛鈔同論知情糶買十

石以上杖一百七十石之下九十七其漕運官吏有失

覺察者驗糧數多寡治罪其盜糶糧價結攬飛鈔追徵

沒官正糧於倉官并結攬糶買人均徵還官 諸倉庫

官吏人等盜所主守錢糧一貫以下決五十七至十貫

杖六十七每二十貫加一等一百二十貫徒一年每三

十貫加半年二百四十貫徒三年三百貫處死計贓以

至元鈔為則諸物以當時價估折計之 諸倉庫官知

庫子攢典斗脚人等侵盜移易官物匿不舉發者與犯人同罪失覺察者減犯人罪四等 諸倉庫錢糧出納所設首領官及提舉監支納以下攢典合干人以上互相覺察若有違法短少一體均陪在內收支錢糧正收倒除皆完方許給由 諸典守鈔庫官已倒昏鈔不用退印答五十七解見任提調官失計點答一十七並記過名 諸鈔庫官輒以自己昏鈔詭名倒換者答三十七記過 諸平準行用庫倒換昏鈔多取工墨錢庫官

知而不曾分贓者減一等並解職別敘主謀又受贓者

以枉法論除名不敘 諸白紙坊典守官私受桑楮皮

折價者計贓以枉法論除名不敘仍追贓收買本色還

官 諸京倉受糧部官董之外倉收糧州縣長官董之

收不如法致腐敗者按治官通究之 諸倉官委任親

屬為家丁致盜糶官糧者答五十七解職殿敘同僚相

容隱四十七解職 諸倉官輒翻釘官斛多收民租主

謀者答五十七同僚初不知情既知而不能改正者三

十七並解職別敘 諸京師每日散糶官米人止一斗

權豪勢要及有祿之家輒糶買者笞二十七追中統鈔

二十五貫付告人充賞 諸官局造作典守輒剋除材

料者計贓以枉法論除名不敘 諸運司辦課官取受

事發辦課畢日追問受代離職者就問之 諸鹽場官

勘問犯人致死者從轉運司差官攝其職發犯人歸有

司 諸稅務官輒以民到務文契枉作匿稅私其罰錢

者以枉法論除名不敘 諸財賦總管淘金提舉司存

雖有護持制書事應糾劾者監察御史廉訪司準法行之
諸守庫藏軍官夜不直宿致有盜者笞二十七還
職捕盜不獲者圍宿軍官軍人追陪所失物貨俟獲盜
徵贓給還若遇強劫軍官軍人力所不及者不在追斷
之限 諸雜造局院輒與諸人帶造軍器者禁之 諸
兩浙財賦府隸徽政者掌治錢穀造作歲終報成以次
年正月至于二月從廉訪司稽其文書違者糾之 諸
有司橋梁不修道塗不治雖修治而不牢强者按治及

監臨官究治之 諸有司不以時修築堤防霖雨旣降
水潦並至漂民廬舍溺民妻子為民害者本郡官吏各
罰俸一月縣官各笞二十七典史各一十七並記過名
諸漕運官輒拘括水陸舟車阻滯商旅者禁之 諸

漕運官輒受贓縱水手人等以稻糠盜換官糧者以枉
法計贓論罪除名不敘 諸海道都漕運萬戶府所轄
千戶已下有罪萬戶問之萬戶有罪行省問之徇情者
監察御史廉訪司察之漕事畢然後廉訪司考其案牘

諸海道運糧船戶盜糶官糧詐稱遭風覆沒者計贓

刺斷雖會赦仍刺之 諸使臣行李托克托和斯及驛

吏輒搜檢者禁之 諸使臣行橐過重壓損驛馬托克

托和斯與使臣交贈為好不以法稱盤者答二十七記

過 諸急遞鋪輒開所遞實封文書妄入無名文字者

答五十七 諸急遞鋪每上下半月府州判官縣主簿

親臨檢視所遞文字但有稽違磨擦沉匿鋪司鋪兵即

驗事重輕論罪各路正官一員總之廉訪司察之其有

弗職親臨官初犯笞一十七再犯加一等三犯呈省別
議總提調官減親臨官一等每季具申上司有無稽違
仍於各官任滿日解由開寫而黜陟之 諸使臣輒騎
壞駒馬者取與各笞五十七及以車易馬者俱坐之

諸公主下嫁迎送往還並不得由傳置 諸使臣在城
輒騎占驛馬者禁之違者罪之 諸驛使在路奪回馬
易所乘馬馳至死者償其直若以私事故選良馬馳至
死者笞二十七仍償其直 諸使臣多取分例笞一十

七追所多還官記過使還人員除軍情急務外日不過
三驛驛官仍於關文標寫起止程期違者各答二十七
再犯罷役 諸乘驛使臣或枉道營私橫索祇待或訪
舊逸遊餓損馬乘並申聞斷治 諸使臣枉道馳驛者
答五十七托克托和斯擅依隨給驛者依例科罰 諸
驛使詐改公牒多起馬者杖八十七其部押官馬輒夾帶
私馬多取草料者并沒入其私馬 諸朝廷軍情大事
奉旨遣使者佩以金字圓符給驛其餘小事止用御寶

聖旨諸王公主駙馬亦為軍情急務遣使者佩以銀字
圓符給驛其餘止用御寶聖旨若濫給者從臺憲糾察
之諸高麗使臣所帶徒從來則俱來去則俱去輒留
中路郡邑買賣者禁之易馬出界者禁之諸出使官
員所至輒受官吏筵宴及官吏輒相邀請並從風憲糾
察諸使臣所過州縣無故不得入城有故入城者止
於公館安宿輒宿於官民之家者從風憲糾之諸遣
使開讀詔書所過州郡就便開讀者聽非所經由而輒

往者禁之若本宗事須親往者不在此限 諸使臣所

至之處有親戚故舊禮應追往者聽 諸受命出使還

匿給驛文字符節及錫貢之物久不進者杖六十七記

過 諸進表使臣五日外不還職托故稽留他有營者

止所給驛籍其姓名罷黜之 諸出使郡國使事之外

毋有所與有必須上聞者實封以聞 諸銜命出使輒

將有司刑囚審斷者罪之 諸奉使循行郡縣有告廉

訪司官不法者若其人嘗為風憲所黜罷則與監察

御史雜問之餘聽專問 諸官吏公差輒受人賕行禮
物者隨事論罪官還職吏發隣道貼補 諸捕盜境內
若失過盜賊却獲他境盜賊許令功過相補如獲他境
強盜或偽造寶鈔二起各准境內強盜一起無強者准
竊盜二起如獲竊盜准亦如之如境內無失但獲強竊
盜賊依例理賞若應捕之人及事主等告指捕獲者不
賞 諸捕盜官不得差遣違者臺憲官糾之 諸捕盜
官任內失過盜賊除獲別境盜準折外三限不獲強盜

三起竊盜五起各笞一十七強盜五起竊盜十起各笞

二十七強盜十起竊盜十五起各笞三十七鎮守軍官

一體捕限者同罪親民提控捕盜減罪二等其限內獲

賊及半者免罪若諸人獲盜應賞者賞之 諸南北兵

馬司職在巡警非違捕逐盜賊輒理民訟者禁之 諸

南北兵馬司罪囚八十七以下決遣應刺配者就刺配

之 諸各路在城錄事錄判分番巡捕若有失盜止坐

巡捕官 諸職官非應捕之人告獲反賊者陞二等用

諸告獲強盜每名官給賞錢至元鈔五十貫竊盜二

十五貫親獲者倍之獲強盜至五人與一官 諸捕獲

弑逆兇徒比獲強盜給賞 諸隨處鎮守軍官軍人親

獲強竊盜賊者減半給賞 諸郡城失盜一年不獲者

勒巡軍賠償所盜財物其敢差占巡軍者禁之 諸捕

盜官捕獲強竊盜賊不即牒發淹禁死亡者杖七十七

罷職 諸盜牛馬悔過放還者以竊盜已行不得財論

不徵倍贓賞錢有司輒以常盜刺斷者以刑名違錯科

罰 諸捕盜官輒受人遞至匿名文字枉勘平人為盜

致囚死獄中者杖九十七罷職不敘正問官六十七降

先職二等敘首領官笞四十七注邊遠一任承吏杖六

十七罷役不敘主意寫匿名文書者杖一百七流遠遞

送匿名文書者減二等受命主事遞送者減三等 諸

捕盜官搜捕逆賊輒將平人審問蹤跡乘怒毆之邂逅

致死者杖六十七解職別敘記過徵燒埋銀給苦主

諸捕盜官受財故縱賊囚者與犯人同罪已敗獲者徒

杖並減一等 諸父有罪不坐其子兄有罪不坐其弟

諸大宗正府理斷人命重事必以漢字立案牘以公

文移憲臺然後監察御史審覆之 諸有司非法用刑

者重罪之已殺之人輒鬻割其肉而去者禁之違者重

罪之 諸鞠獄不能正其心和其氣感之以誠動之以

情推之以理輒施以大披挂及王侍郎繩索并法外慘

酷之刑者悉禁止之 諸鞠問罪囚除朝省委問大獄

外不得寅夜問事廉訪司察之 諸各路推官專掌推

鞠刑獄平反冤滯董理州縣刑名之事其餘庶務毋有
所與按治官歲錄其殿最秩滿則上其事而黜陟之凡
推官若受差不聞上司輒離職者亦坐罪 諸處斷重
囚雖叛逆必令臺憲審錄而後斬於市曹 諸内外囚
禁從各路正官及監察御史廉訪司以時審錄輕者斷
遣重者結案其有冤滯就糾察之 諸正蒙古人除犯
死罪監禁依常法有司毋得拷掠仍日給飲食犯真姦
盜者解束帶佩囊散收餘犯輕重者以理對證有司勿

執拘之逃逸者監收 諸奏決天下囚值上怒勿輒奏

上欲有所誅必遲回一二日乃覆奏 諸有司因公依

理決罰邂逅身死者不坐 諸累過不悛年七十以上

應罰贖者仍減等科決 諸犯罪二罪俱發以重者論

罪等從一若一罪先發已經論決餘罪後發其輕若等

勿論重者更論之通計前罪以充後數 諸職官輒以

微故乘怒不取招詞斷決人邂逅致死又誘苦主焚瘞

其屍者答五十七解職別敘記過 諸鞠獄輒以私怨

暴怒去衣鞭背者禁之

諸鞠問囚徒重事須加拷訊

者長貳僚佐會議立案然後行之違者重加其罪 諸

弓兵祇候獄卒輒毆死罪囚者為首杖一百七為從減
一等均徵燒埋銀給苦主其枉死應徵倍贓者免徵

諸有司輒收禁無罪之人者正官並答一十七記過無

招枉禁致自縊而死者答三十七期年後敘 諸有司

輒將無辜枉禁瘐死者解職降先品一等敘 諸有司

承告被盜輒將警迹人非理枉勘身死却獲正賊者正

問官答五十七解職期年後降先職一等敘首領官及承吏各五十七罷役不敘均徵燒埋銀給苦主通記過名 諸有司受財故縱正賊誣執非罪非法拷訊連逮妻子銜冤赴獄事未曉白身已就死正官杖一百七除名佐官八十七降二等雜職敘仍均徵燒埋銀 諸有司故入人罪若未決者及因自死者以所入罪減一等論入人全罪以全罪論若未決放仍以減等論 諸故出人之罪應全科而未決放者從減等論仍記過 諸

失入人之罪者減三等失出人罪者減五等未決放者

又減一等並記過 諸有司失出人死罪者答五十七

解職期年後降先品一等敘記過正犯人追禁結案

諸有司輒將革前雜犯承問斷遣者以故入論 諸監

臨挾仇違法枉斷所監臨職官者抵罪不敘 諸審囚

官強愎自用輒將蒙古人刺字者杖七十七除名將已

刺字去之 諸為盜並從有司歸問各投下輒擅斷遣

者坐罪 諸鬪毆殺人無輕重並結案上省部詳讞有

司輒任情擅斷者笞五十七解職期年後降先品一等敘
諸禁囚因械梏不嚴致反獄者直日押獄杖九十
七獄卒各七十七司獄及提牢官皆坐罪百日內全獲
者不坐 諸罪在大惡官吏受贓縱令私和者罷之

諸司獄受財縱犯姦囚人在禁疎枷飲酒者以枉法科
罪除名 諸流囚強盜持仗不曾傷人但得財若得財
至二十貫為從不持仗不曾傷人得財四十貫為從及
竊盜割車剗房傷事主為從不曾傷事主但曾得財不

曾得財內有舊賊初犯齊喇司盜馳馬牛為從畧賣良
人為奴婢一人詐雕都省行省印套畫省官押字動支
錢糧干碍選法或妄造妖言犯上並杖一百七流尼魯
罕初犯盜馳馬牛為首及盜財三百貫以上盜財十貫
以下經斷再犯發冢開棺傷屍內應流者挑刺裨湊寶
鈔以真作偽再犯知情買使偽鈔三犯並杖一百七發
肇州屯種 諸犯罪流遠逃歸再獲仍流若中路遭亂
而逃不再犯及已老病并會赦者釋之 諸流囚居役

非遇元正寒食重午等節並勿給假 諸配役囚徒遇

閏月通理之 諸應徙流未行會赦者釋之已行未至

會赦者亦釋之 諸囚徒配役役所停罷者會赦免放

諸有罪奉旨流遠雖會赦非奏請不得放還 諸徒

罪晝則帶鐐居役夜則入囚牢房其流罪發各處屯種

者止令監臨關防屯種 諸流遠囚徒惟女直高麗二

族流湖廣餘並流尼魯罕及取海青之地 諸徒流無

配役之所者發鹽司居役 諸主守失囚者減囚罪三

等長押流囚官中路失囚者視提牢官減主守罪四等
既斷還職 諸大小刑獄應監繫之人並送司獄司分
輕重監收 諸掌刑獄輒縱囚徒在禁飲博及帶刀刃
紙筆陰陽文字入禁者罪之 諸獄具枷長五尺以上
六尺以下濶一尺四寸以上一尺六寸以下死罪重二
十五斤徒流二十斤杖罪一十五斤皆以乾木為之長
濶輕重各刻誌其上杻長一尺六寸以上二尺以下橫
三寸厚一寸鎖長八尺以上一丈二尺以下鐐連環重

三斤笞大頭徑二分七釐小頭徑一分七釐罪五十七
以下用之杖大頭徑三分二釐小頭徑二分二釐罪六
十七以上用之訊杖大頭徑四分五釐小頭徑三分五
釐長三尺五寸並刊削節目無令筋膠諸物裝釘應決
者並用小頭其決笞及杖者醫受拷訊者醫若股分受
務令均停 諸郡縣佐貳及幕官每月分番提牢三日
一親臨點視其有枉禁及淹延者即舉問月終則具囚
數牒次官其在上都囚禁從留守司提之 諸南北兵

馬司每月分番提牢仍令提控案牘兼掌囚禁 諸鹽

運司監收鹽徒每月佐貳官分番董視與有司同 諸

內郡官仕雲南者有罪依常律土官有罪罰而不廢

諸左右兩江所部土官輒興兵相讐殺者坐以叛逆之

罪其有妄相告言者以其罪罪之有司受財妄聽者以

枉法論 諸土官有能愛撫軍民境內寧謐者三年一

次保勘陞官其有勲勞及應陞賞承襲文字至帥府輒

非理疏駁故為難阻者罷之

祭令

諸國家有事郊廟凡獻官及百執事之人受誓戒之後散齊宿於正寢致齊宿於祀所散齊日治事如故不弔喪問疾不作樂不判署刑殺文字不決罰罪人不與穢惡事致齊日惟祀事得行餘悉禁之 諸嶽鎮名山國家之所秩祀小民輒僭禮犯義以祈禱褻瀆者禁之

諸五嶽四瀆五鎮國家秩祀有常諸王公主駙馬輒遣人降香致祭者禁之 諸郡縣宣聖廟凡官員使臣軍

馬輒敢館穀於內有司輒敢聽訟宴飲於內工官輒敢
營造於內並行禁之諸書院同諸每月朔望郡縣長
吏率其參佐僚屬詣孔子廟拜謁禮畢從學官升堂講
說其鄉村市鎮亦擇有學問德行可為師長者於農隙
之時以教導民其有視為迂緩而不務者糾之

學規

諸蒙古漢人國子監學官任內驗其教養出格生員多
寡以為陞遷博士教授有闕從監察御史舉之其不稱

職者黜之坐及元舉之官 諸國子生悖慢師長及行
禮失儀言行不謹講誦不熟功課不辦無故廢學有故
不告輒出告假違限執事失悞忿戾鬪爭並委正錄糾
舉除悖慢師長別議餘者初犯戒諭再犯三犯酌量責
罰其廚人僕夫門子常切在學供給使令違者就便決
責 諸國學居首善之地六館諸生以次陞齋毋或躡
等其有未應陞而求陞及魯犯學規者輕者降之重者
黜之其教之不以道者監察御史糾之 諸國子監私

試積分生員其有不事課業及一切違戾規矩初犯罰一分再犯罰二分三犯除名已補高等生員其有違戾規矩初犯殿試一年再犯除名並從學正錄糾舉正錄知見不糾舉者從本監議罰在學生員歲終實厯坐齋不滿半周歲者並除名除月假外其餘告假不用準算學錄歲終通行考較漢人生員三年不能通一經及不肯篤勤者勒令出學 諸奎章閣授經郎生員每月朔望上弦下弦給假四日當入宿衛者給假三日餘有故

須請假者於授經郎稟說附歷給假無故不入學第一次罰當日會食第二次於師席前罰拜及當日會食第三次於學士院及師席前罰拜及當日會食三次不改奏聞懲戒黜退 諸隨路學校計其錢糧多寡養育生徒提調正官時一詣學督視必使課講有程訓迪有法賞勤罰惰作成人材其學政不舉者究之 諸教官在任侵盜錢糧荒廢廟宇教養無實行止不臧有忝師席從廉訪司糾之任滿有司輒朦朧給由者究之 諸贍

學田土學官職吏或賣熟為荒減額收租或受財縱令

豪右占佃陷沒兼并及巧名冒支者提調官究之 諸

貧寒老病之士必為衆所尊敬者保申本路體覆無異

下本學養贍仍移廉訪司察之但有冒濫從提調官改

正 諸各處學校為講習作養之地有司輒侵借其錢

糧者禁之教官不稱職者廉訪司糾之 諸在任及已

代教官輒攜家入學褻瀆居止者從廉訪司糾之 諸

各路醫學大小生員不令坐齋肄業有名無實及在學

而訓誨無法課講鹵莽苟應故事者教授正錄提調官
罰俸有差 諸醫人於十三科內不能精通一科者不
得行醫太醫院不精加考試輒以私妄舉充隨朝太醫
及內外郡縣醫官內外郡縣醫學不依法考試輒縱人
行醫者並從監察御史廉訪司察之

軍律

諸軍官離職屯軍離營行軍離其部伍者皆有罪 諸
軍官不得擅離部署赴闕言事有必合言者實封附遞

以聞 諸隨處軍馬有久遠營屯或時暫經過並從官
給糧食輒妨擾農民阻滯客旅者禁之 諸臨陣先退
者處死 諸統軍捕逐寇盜分守要害約相為聲援稽
留失期致殺死將士仍不即追襲者處死雖曾赦罷職
不敘 諸軍民官鎮守邊陲帥兵擊賊紀律無統變易
號令背約失期形分勢格致令破軍殺將或未戰逃歸
或棄城退走復能建招徠之功者減其罪無功者各以
其罪罪之 諸防戍軍人於屯所逃者杖一百七再犯

者處死若科定出征逃匿者斬以徇 諸軍戶貧乏已
經存恤而復逃者杖八十七發遣當軍隱藏者減二等
兩鄰知而不首者又減隱藏罪二等 諸軍戶告乏求
替者從有司覆實之其詐妄者廉訪司究之 諸各衛
扈從漢軍每戶選練習壯丁一人常充仍於貼戶內選
兩人輪番供役其有故必合替換者自萬戶及千百戶
相視所換之可用然後用之百戶千戶萬戶私換者驗
名數多寡論罪解降 諸管軍官吏受錢代替軍空名

者驗入已錢數以枉法科罪除名令兄弟子姪驅丁代
替者驗名數多寡論罪解降 諸軍馬征伐擄掠良民
兇徒射利畧賣人口或自賊殺或以病亡棄屍道路暴
骸溝壑者嚴行禁止

戶婚

諸匠戶子女使男習工事女習黼黻其輒敢拘刷者禁
之 諸係官當差人戶非奉朝省文字輒投充諸王及
各投下給使者論罪 諸僧道還俗兄弟析居奴放為

良未入于籍者應諸王諸子公主駙馬母拘藏之民有
敢隱藏者罪之 諸庶民有妄以漏籍戶及土田於諸
王公主駙馬呈獻者論罪諸投下輒濫收者亦罪之

諸官吏占人戶供給私用者治罪 諸有司治賦斂急

致貧民鬻男女為輸者追還所鬻男女而正有司罪價
勿償 諸生女溺死者沒其家財之半以勞軍首者為
奴即以為良有司失舉者罪之 諸民戶流移所在有

司起遣復業輒以拉木伊克人收之者禁之 諸鰥寡孤獨

老弱殘疾窮而無告者於養濟院收養應收養而不收
養不應收養而收養者罪其守宰按治官糾察之 諸
被災流民有司招諭復業其年深不能復業及失所在
者蠲其賦輒抑民包納者從臺憲糾之 諸年穀不熟
人民轉徙所至既經賑濟復聚黨持仗剽劫財物毆傷平
民者除孤老殘疾不能自贍任便居住有司依前存養
其餘有子弟者驗其家口計程遠近支與行糧次第押
還元籍沿路復為民害者從所在有司斷遣 諸蒙古

回回契丹女直漢人軍前所俘人口留家者為奴婢居
外附籍者即為良民已居外復認為奴婢者沒入其家
財諸收捕叛亂軍人掠取生口並從按治官及軍民
官一同審閱實為賊黨妻屬者給公據付之無公據者
以掠良民之罪罪之諸羣盜降附以所劫掠男女充
收捕官饋獻者勿受仍還為民無親屬可收係者使男
女相配聽為民其留賊所者悉縱之諸收到被掠婦人
忘其鄉里并無親屬可歸者有司與之嫁聘所得聘財

與資粧束 諸軍民官輒隱藏降附人民不令復業者

者罪之 諸籍没人口元主私典賣者追收入官徵價

還主 諸投下官員招占已籍係官民匠戶計者没

其家財所占戶歸本籍 諸投下所籍戶令出五戶

絲餘悉勿與其有橫歛於民從憲臺究之 諸願棄

俗出家為僧道若本戶丁多差役不闕及有兄弟足以

侍養父母者於本籍有司陳請保勘申路給據簪剃違

者斷罪歸俗 諸河西僧人有妻子者當差發稅糧鋪

馬次舍與庶民同其無妻子者蠲除之 諸父母在分

財異居父母困乏不共子職及同宗有服之親鰥寡孤
獨老弱殘疾不能自存寄食養濟院不行收養者重議
其罪親族亦貧不能給者許養濟院收錄 諸典賣田

宅從有司給據立契買主賣主隨時赴有司推收稅糧
若買主權豪官吏阿徇不即過割止令賣主納稅或為
分派別戶包納或為立詭名但受分文之贓笞五十七
仍於買主名下驗元價追徵以半沒官半付告者首領

官及所掌吏斷罪罷役 諸典賣田宅須從尊長書押

給據立帳歷問有服房親及隣人典主不願交易者限
十日批退違限不批退者答一十七願者限十五日議
價立契成交違限不酬價者答二十七任便交易親隣
典主故相邀阻需求書字錢物者答二十七業主虛張
高價不相由問成交者答三十七仍聽親鄰典主百日
收贖限外不得爭訴業主欺昧故不交業者答四十七
親鄰典主在他所者百里之外不在由問之限若違例

事覺有司不以理聽斷者監察御史廉訪司糾之 諸
軍官軍人不歸營屯到任官員不歸官舍往來使臣不
歸館驛輒於民家居止為民害者行省行臺起遣究治
到任官無官舍出私錢僦居者聽 諸造謀以已賣田
宅誣買主占奪脅取錢物者計贓論罪仍紅泥粉壁書
過于門 諸婚田訴訟必於本年結絕已經務停而不
結絕者從廉訪司及本管上司正官吏之罪累經務停
而不結絕者即與歸結不在務停之限違者罪亦如之

其所爭田內租入納稅之外並從有司收貯斷後隨田

給付 諸以女子典雇於人及典雇人之子女者並禁

止之若已典雇願以婚嫁之禮為妻妾者聽 諸受錢

典雇妻妾者禁其夫婦同雇而不相離者聽 諸受財

嫁賣妻妾及過房弟妹者禁 諸乞養過房男女者聽

轉賣為奴婢者禁之奴婢過房良民者禁之 諸守宰

抑取部民男女為奴婢者杖七十七期年後降二等雜

職敘 諸妄認良人為奴非理殘虐者杖八十七有官

者罷之 諸訴良得實給據居住候元籍親屬收領無
親屬者聽令自便 諸奴婢背主在逃杖七十七 諸
男女議婚有以指腹割衿為定者禁之 諸嫁娶之家
飲食宴好求足成禮以華侈相尚暮夜不休者禁之

諸男女婚姻媒氏違例多索聘財及多取媒利者諭衆
決遣 諸女子已許嫁而未成婚其夫家犯叛逆應沒
入者若其夫為盜及犯流遠者皆聽改嫁已成婚有子
其夫雖為盜受罪勿改嫁 諸男女既定婚其女犯姦

事覺夫家欲棄則追還聘財不棄則減半成婚若夫家
輒詭以風聞姦事恐脅成親者答五十七離之 諸遭
父母喪忘哀拜靈成婚者杖八十七離之有官者罷之
仍沒其聘財婦人不坐 諸服內定婚各減服內成親
罪二等仍離之聘財沒官 諸有女許嫁已報書及有
私約或已受聘財而輒悔者答三十七更許他人者答
四十七已成婚者五十七後娶知情者減一等女歸前
夫男家悔者不坐不追聘財五年無故不娶者有司給

據改嫁 諸有女納婿復逐婿納他人為婿者杖六十

七後婿同其罪女歸前夫聘財沒官 諸職官娶娼為

妻者笞五十七解職離之 諸有妻妾復娶妻妾者笞

四十七離之在官者解職記過不追聘財 諸先通姦

被斷復娶以為妻妾者雖有所生男女猶離之 諸轉

嫁已歸未成婚男婦者杖六十七婦歸宗聘財沒官

諸受財以妻轉嫁者杖六十七追還聘財娶者不知情

不坐婦人歸宗 諸以書幣娶人女為妾復受財轉嫁

他人者笞五十七聘財没官妾歸宗有官者罷之 諸

僧道悖教娶妻者杖六十七離之僧道還俗為民聘財

没官 諸典賣佃戶者禁佃戶嫁娶從其父母 諸兄

收弟婦者杖一百七婦九十七離之雖出首仍坐主婚

笞五十七行媒三十七 諸居父母喪姦收庶母者各

杖一百七離之有官者除名 諸漢人南人父沒子收

其庶母兄沒弟收其嫂者禁之 諸姑表兄弟嫂叔不

相收收者以姦論 諸奴收主妻者以姦論強收主女

者處死 諸為子輒以亡父之妾與人輒受而私之

與者杖七十七受者笞五十七 諸受財強嫁所監臨

妻以枉法論杖七十七除名追財沒官妻還前夫 諸

良家女願與人奴為婚者即為奴婢娶良家女為妻以

為奴婢賣之者即改正為良賣主買主同罪價沒官

諸以童養未成婚男婦轉配其奴者笞五十七婦歸宗

不追聘財 諸逃奴有女嫁為良人妻已有男女而本

主覺察者追其聘財歸本主婦人不離 諸棄妻已歸

宗改嫁者從其後夫 諸棄妻改嫁後夫亡復納以為

妻者離之 諸夫婦不相睦賣休買休者禁之違者罪

之和離者不坐 諸出妻妾須約以書契聽其改嫁以

手模為徵者禁之 諸婦人背夫棄舅姑出家為尼者

杖六十七還其夫 諸賣買良人為娼賣主買主同罪

婦還為良價錢半沒官半付告者或婦人自陳或因事

發覺全沒入之良家婦犯姦為夫所棄或娼優親屬願

為娼者聽 諸娼女孕勒令墮胎者犯人坐罪娼放為

良 諸勒妻妾為娼者杖八十七以乞養良家女為人
歌舞給宴樂及勒為娼者杖七十七婦人並歸宗勒奴
婢為娼者笞四十七婦人放從良 諸受財縱妻妾為
娼者本夫與姦婦姦夫各杖八十七離之其妻妾隨時
自首者不坐若日月已久纔自首者勿聽

元史卷一百三

元史卷一百三考證

刑法志二從廉訪考閱之 按考原刻訛者今據永樂

大典改

刑法志二枉作匿稅 按稅字下原刻重一稅字今據

文義刪

刑法志二諸有司承告被盜輒將警迹人非理枉勘身

死却獲正賊者正問官笞五十七解職 按警原刻

訛景考官民準用凡強盜免死竊盜再犯皆刺字籍

充警迹人令村坊常切檢察遇出處經宿或移他所
報隣右知至正條亦同今據改

刑法志二諸土官原刻訛上官今據文義改又此條誤
上文連為一條今改空一格

志二散齊宿於正寢致齊宿於祀所 按致齊句
原刻脫宿字今據文義增

刑法志二餘者初犯戒諭再犯三犯酌量責罰 按諭
原刻訛論酌原刻訛約今據文義改



總校官編修臣吳紹濬